

MME ITEM EMI ENỌDE MME ANDITIENE-CHRIST

1 Peter 3:1-22; 4:1-19; 5:1-11

ỌYỌHỌ UKPEP-ŃKPỌ 453

Eke Mkparawa

IKỌ IBUOT: “Esuhoṛe idem ndien ke idak ọkpọsọn ubọk Abasi, man Enye ekpemenere mbufo onim ke enyọn ke edikem ini” (1 Peter 5:6).

Ubiọnọ Ke Akam

Mme n̄wed emi Peter ekewetde ekenọ mmọ esọk mme anditiene-Christ. Anditiene-Christ edi owo emi etienede Jesus ye mme ukpep-ńkpọ Esie. Anditiene-Christ edi andinim Ikọ Abasi ke akpanikọ, onyũ anam se N̄wed Abasi ekpepde. Ndien “ebem iso esio mbet enyiń Christian ke Antioch” (Utom Mme Apostle 11:26).

Ke owo ama ọkọbọ erinyańa, enye enyene ndika iso nsańa ye Abasi, man ọbọk ukpọn esie. Owo enyene ndikot N̄wed Abasi nnyũ mbọn akam kpukpru usen. Peter ama emen owut ndusuk ńkpọ emi ekemedede ndibiọnọ owo ndibọ ibọrọ akam esie. Owo enyene ndikpeme nte enye odude uwem ke otu mbon ufọk esie ye mme ufan esie. Ata anditiene-Christ odu uwem ọnọ Jesus kpukpru ini, idighe ke ufọk-Abasi ikpọn-ikpọn edi ke ufọk, ke ufọk-n̄wed, ke itie utom ye ke itie mbre. Edieke Jesus odude owo ke esit, enye oyoyom ndidu eti uwem, atua owo mbọm, onyũ enyene ima. Enye emi Jesus ọnọde obufa esit eyenam nti ńkpọ ọnọ kpukpru owo, kpa ye mmọ emi mimaha enye. Jesus ama ekpep ikọt Esie Akakan Mbet Uwem: “Ntre sededi mbufo eyomde owo anam ye mbufo, enam kpa ntre ye mmọ” (Matthew 7:12).

Mme N̄kpọ Mbana-idem

Ke ediwak ini mme owo ema ndisine ńkpọ nte eyede ke iso mbon efen, ke ndińwana ndidip se idude ke esit mmọ. Nte esit owo etiede akam edi akpan ńkpọ akan se ekutde ke enyọn idem. Owo ekeme ndinyene ndiye ọfọn-idem ye nti edu-uwem, ọsọn-urua n̄kanika-ubọk ye ediwak ubom-isoń edi Abasi ese esit akan kpukpru mme ńkpọ emi. Ke mme usen David, Samuel, anditiń ntiń-nnim ikọ ama ọdọhọ ete, “Koro (mmensehe) nte owo esede; koro owo esede enyin, edi Jehovah ese esit” (1 Samuel 16:7).

Peter ama ekpep ete “ke suń-suń spirit eke enyenede iso but” edi se isońde urua ke enyin Abasi. Owo inyeneke nditiń inọ mbon efen ete ke imọ imenyene eti esit me ndidọho ete ke imọ imenyene suń-suń spirit eke enyenede iso but. Mme ńkpọ oro eto Abasi enyũ ekpuhoṛe mme edinam ye edu-uwem owo. Ke owo ọbọde erinyańa, enye enyene obufa esit. Ndien nte enye okopde uyo Abasi, nte enye ọbọnde akam ọnyũ ayakde idem esie ọnọ Abasi, enye eyebọ Abasi mme mfọn anditiene-Christ emi; enye eyenyene edisine-ńkpọ eke spirit; enye eyenyene mme mfri spirit. (N̄wed Mbon Galatia 5:22, 23). Anditiene-Christ enyene ndisine ọfọn nte anditiene-Christ, inyũ isanake ńkpọ ye n̄wọrọ-nda ido edisine-ńkpọ ererimbot. Mme anditiene-Christ ana enyene ukpuhoṛe ye udim nditọ ererimbot, enyũ eńwana ndinọ Abasi ubọn ke ido edisine-ńkpọ, ye nte ekamade idem mmọ.

Ukpeme

“Koro enyin Jehovah ke sese ndinen owo, utọn Esie onyũ ọbiọnọ eseme mmọ, edi Jehovah asasak iso ese mmọ emi enamde idiọk.” Se utọ ndọnesit emi anditiene-Christ enyenede ke ndifiọk nte ke Abasi okut kpukpru ńkpọ: mme ńkpọ eke enamde enye ye mme ńkpọ eke enye enamde! Ọfọn didie ndifiọk nte ke enye ekeme ndikot Abasi, n̄ko ke utọn Abasi ana ińwań ndikop akam! Ke ini unana, owo ekeme ndiyom uńwam edi enye ifiọkke me baba owo kiet eyekop me baba owo kiet eyenyũ oyom ndińwam enye. Nso utọ edidiọn ke anditiene-Christ enyene, ke ndifiọk nte ke Abasi ke esese, ke onyũ akpań utọn, kebet ndikpeme nnyũ n̄ńwam enye!

Nte Abasi ọdiọnọ abańa mmọ eke mibọhọ erinyańa? Ke Mme N̄ke 15:3, nnyin imokut ite, “Enyin Jehovah odu ke kpukpru ebiet, ese mme idiọk owo ye nti.” Abasi ọfiọk se mme owo enamde, eti ye idiọk, edi Enye “asasak iso ese mmọ emi enamde idiọk.” Kere se ọwọrọde, ke owo enyenede idiọk-ńkpọ ke esit esie. Abasi inemke esit ye utọ mmọ oro, ntre mmọ ikemeke-keme ndinyene ata emem tutu ekpuhoṛe esit mmọ, idiọk-ńkpọ inyũ iduhe aba. Abasi ekeme ndikut esit fo; nyũ ti ete Enye ke esese fi. Edi mmem-mmem ńkpọ nnyin ndikut nte ke ọfọn owo ndinam ńkpọ n̄nọ Jesus nnyũ nnyene uńwam ye ukpeme Esie.

Idorenyin

Ke esiode kpukpru emi efep, anditiene-Christ enyene ata akwa idorenyin, nte ke Jesus eyedu ye enye, ke Jesus eyeñwam enye, ke Jesus eyemum enye akama, ñko ke Jesus eyeda enye aka ke Heaven. Ekewet Ñwed Abasi man “nnyin inyene idorenyin oto ke ime ye ndoñ-esit eke Ñwed Abasi ọnọde” (Ñwed Mbon Rome 15:4). Idorenyin edi ukwak-ubom ukpoñ nnyin (Mme Hebrew 6:19) onyũ edemere esit owo ndinam idem asana (1 John 3:3). “Dori enyin ye Abasi” (Psalm 42:11).

Peter ama ọdọhọ ete ke ana nte anditiene-Christ “ebeñe idem ndibọrọ kpukpru owo eke edibupde...ntak idorenyin” emi enye enyenede. Ndusuk ini ekeme ndibup owo ntak emi esit enemde enye me se inamde enye asak imam. Anditiene-Christ ekeme ndidọhọ ete ke emem Abasi odu ke esit imọ ndien ke idiok-ñkpọ inyũ iduhe aba. Ediwak ntak efen edu owo ndinyene idorenyin.

Idorenyin emi, emem, ye kpukpru mme ntak efen emi inọde oto ke emi Christ akakpade ọnọ nnyin. Enye ọkọduok iyip Esie man nnyin “inyene uwem” man enyũ “ededioñ enyene ekan” (John 10:10).

Ndutuho

Peter ama etiñ abaña ndutuho Christ, “edinen owo ke ibuot mmọ eke minenke man Enye ada nnyin ọsok Abasi.” Mme nsio-nsio ndutuho edu: ubiak eke ikpohiden ye eke ukpoñ ye ntimere-esit. Jesus ama okut ndutuho ke nsio-nsio usuñ. Enye ama enyene ubiak ke ikpohidem ke ini emi Enye ọkọkọñde ke kros. Enye ama odu ke akamba nnan-enyin ke spirit ke ini Abasi ọkọwọñrede iso Esie ọkpoñ Enye (Matthew 27:46), ke ini Peter akakañde Enye (Mark 14:68-72), ye ini emi Enye okodude ke ọkpoşoñ eñwan ke akam ke Gethsemane (Luke 22:44). Jesus ama okut idomo (Luke 4:2), mfuhọ (John 11:35), isin-enyin (Luke 4:28, 29), ye ediwak ñkpọ efen man Enye ekpekeme ndidọñ nnyin esit (Hebrew 2:18) man onyũ ọkpoñ uwut-ñkpọ onim ọnọ nnyin (1 Peter 2:21).

Mme Idomo

Ke Peter ama akabat mme ndutuho emi Christ ọkọbode ke ntak nnyin, enye etiñ ọno mme anditiene-Christ se mmọ ekpenamde ke ini mmọ ekutde ndutuho. Ndusuk owo eyenyene “ikañ-ikañ idomo” edi yak mmọ ekubat ete ke edi isen ñkpọ ọworo mmọ. Edi yak mmọ ekam edat esit ete ke Christ abat ete ke mmọ edot ndinyene idomo. Job ama asaña ebe ke idomo onyũ ọdọhọ ete, “Koro enye ọfiokde usuñ eke odude ye ami: enye odomo mi: nyeworo mbiet gold” (Job 23:10).

Mme anditiene-Christ eyekut isin-enyin. Ke ukworo-ikọ ke enyoñ ọbọ, nnyin imokut ibaña se owo akpanamde ke ini esakde enye nsahi ke idaha esie nte anditiene-Christ. Jesus ama ọdọhọ ete, “Edaresit, edara eti eti: koro utip mbufo ke Heaven omokpon: koro kpa ntre ke mmọ ekenam mme prophet emi ebemde mbufo iso edu isin-enyin” (Matthew 5:12).

Ediwak ye nsio-nsio ndutuho eke enyenede esesit uñwam edu ke ererimbot. Edi ukpuhore odu ye anditiene-Christ emi enode enye eñwoñọ ete, “Edieke imede ime, iyeda uboñ ye Enye” (2 Ñwed Timothy 2:12), ñko edieke ikutde ndutuho ye enye, iyenyũ ida uboñ ye Enye (Ñwed Mbon Rome 8:17).

Nditop Ñkpọşoñ Ekikere Nduok Ndori Jesus

Peter ada ñwed emi okosim utit ke ndisoñọ mme anditiene-Christ idem ndikpeme nnyũ mbọñ akam: ndikpeme koro nnyin imenyene asua emi oyode asaña “nte lion eke ekunide” oyom se atade. Nnyin ikpenyene ndibọñ akam koro nnyin imoyom uñwam Abasi ndidi mbet akpanikọ ye ata mme andikan.

Ke ndisuhore idem ke iso Abasi ye ke iso owo, nnyin imọdiọñọ ite ke edikem ini Abasi eyemenere nnyin onim ke enyoñ. Ke nditop ñkpọşoñ ekikere nnyin nduok ndori Enye, nnyin iyekut ite ke ima Abasi eyeda se ifonde ikan esin ke uwem nnyin onyũ ebeñe nnyin idem ọnọ Heaven. “Ndien Abasi kpukpru mfọn emi okokotde mbufo ete ediduk ke nsinsi uboñ Imọ ke Christ, ke ini mbufo ema ekut ukut ke ekpri ini, eyenam mbufo efọn ema, enyũ esoñọ eda, enyũ ekop idem.”

MME MBUME

- 1 Anie ekewet N̄wed emi?
- 2 Ekewet ọnọ mme anie?
- 3 Didie ke anditiene-Christ akpanam n̄kpọ ke ufọk esie?
- 4 Nso utọ edisine-n̄kpọ ọsọn urua ke enyin Abasi?
- 5 Didie ke owo ekpekeme ndinyene edisine-n̄kpọ oro?
- 6 Idorenyin edi nso?
- 7 Jesus okokut ndutuhọ ke ntak mme anie?
- 8 Nso edi ntak emi anditiene-Christ akpadarade ke ini esinde enye enyin?
- 9 Nso ke Abasi edinam ọno mmọ eke esuhọrede idem ke iso Esie?
- 10 Nso edi ntak emi owo okpotopde n̄kpọsọn ekikere esie ọduok odori Jesus?